

# Horazoden 1

## Gedicht 1

[1] **Maecēnās atavīs ēdite rēgibus,**  
[2] **ō et praesidium et dulce decus meum,**  
[3] **sunt quōs curriculō pulverem Olympicum**  
[4] **collēgisse juvat mētaque fervidīs**  
[5] **ēvitāta rotīs palmaque nōbilis**  
[6] **terrārum dominōs ēvehit ad deōs;**

[7] **hunc, sī mōbilium turba Quiritium**  
[8] **certat tergeminis tollere honōribus;**

[9] **illum, sī propriō condidit horreō**

[10] **quicquid dē Libycīs verritur āreīs.**  
[11] **Gaudentem patriōs findere sarculō**

[12] **āgrōs Attalicīs condiōnibus**  
[13] **numquam dēmoveās, ut trabe Cypriā**  
[14] **Myrtōum pavidus nauta secet mare.**

[15] **Luctantem Īcariīs flūctibus Āfricum**  
[16] **mercātor metuēns ōtium et oppidī**  
[17] **laudat rūra suī; mox reficit ratēs**

[18] **quassās, indocilis pauperiem patī.**  
[19] **Est quī nec veteris pōcula Massicī**  
[20] **nec partem solidō dēmere dē diē**

[21] **spernit, nunc viridī membra sub arbutō**  
[22] **strātus, nunc ad aquae lēne caput sacrae.**  
[23] **Multōs castra juvant et lituō tubae**

[24] **permixtus sonitus bellaque mātribus**  
[25] **dētestāta. Manet sub Jove frīgidō**  
[26] **vēnātor tenerae conjugis inmemor,**  
[27] **seu vīsa est catulīs cerva fidēlibus,**  
[28] **seu rūpit teretīs Marsus aper plagās.**  
[29] **Mē doctārum hederæ praemia frontium**  
[30] **dīs miscent superīs, mē gelidum nemus**  
[31] **Nymphārumque levēs cum Satyrīs chori**  
[32] **sēcernunt populō, sī neque tibiās**  
[33] **Euterpē cohibet nec Polyhymnia**

[34] **Lesbōum refugit tendere barbiton.**  
[35] **Quod sī mē lyricīs vātibus inserēs,**  
[36] **sūblimī feriam sīdera vertice.**

# Gedicht 2

[1] **Jam satis terrīs nivis atque dīrae**

[2] **grandinis mīsit Pater et rubente**  
[3] **dexterā sacrās jaculātus arcēs**  
[4] **terruit Urbem,**  
[5] **terruit gentis, grave nē redīret**  
[6] **saeculum Pyrrhae nova mōnstra questae,**  
[7] **omne cum Prōteus pecus ēgit altōs**  
[8] **vīsere montis,**

[9] **piscium et summā genus haesit ulmō,**  
[10] **nōta quae sēdēs fuerat columbīs,**  
[11] **et superjectō pavidae natārunt**  
[12] **aequore dammae.**

[13] **Vidimus flāvum Tiberim retortis**  
[14] **lītore Ētruscō violenter undis**  
[15] **īre dējectum monumenta rēgis**  
[16] **templaque Vestae,**

[17] **Īliae dum sē nimium querentī**  
[18] **jactat ultōrem, vagus et sinistrā**  
[19] **lābitur ripā Jove nōn probante ux**  
weiber

[20] **ōrius amnis.**  
[21] **Audiet cīvīs acuisse ferrum,**  
[22] **quō gravēs Persae melius perīrent,**

[23] **audiet pugnās vitiō parentum**  
[24] **rāra juvenus.**  
[25] **Quem vocet dīvum populus ruentis**  
[26] **imperī rēbus? Prece quā fatigent**

[27] **virginēs sāctae minus audientem**  
[28] **carmina Vestam?**

[29] **cui dabit partīs scelus expiandī**  
[30] **Juppiter? Tandem veniās precāmur,**  
[31] **nūbe candentis umerōs amictus,**  
[32] **augur Apollō,**  
[33] **sive tū māvīs, Erycina rīdēns,**  
[34] **quam Jocus circumvolat et Cupīdō,**  
[35] **sive nēglēctum genus et nepōtēs**  
[36] **respicis, auctor,**

[37] **heu nimis longō satiāte lūdō,**  
[38] **quem juvat clāmor galeaeque lēvēs,**  
[39] **ācer et Maurī peditis cruentum**  
[40] **voltus in hostem,**  
[41] **sive mūtātā juvenem figūrā**

[42] **āles in terrīs imitāris, almae**  
[43] **filius Mājae, patiēns vocārī**

[44] **Caesaris ultor.**  
[45] **Sērus in caelum redeās diūque**  
[46] **laetus intersīs populō Quirīnī,**  
  
[47] **nēve tē nostrīs vitiīs inīquum**  
[48] **ōcior aura**  
[49] **tollat; hīc magnōs potius triumphōs,**  
[50] **hīc ames dīcī pater atque prīnceps,**  
  
[51] **neu sinās Mēdōs equitāre inultōs**  
[52] **tē duce, Caesar.**

## Gedicht 3

[1] **Sic tē dīva potēns Cypri,**  
[2] **sic frātrēs Helenae, lūcida sīdera,**  
[3] **ventōrumque regat pater**  
[4] **obstrictīs aliīs praeter lāpyga,**  
  
[5] **nāvis, quae tibi crēditum**  
  
[6] **dēbēs Vergilium; finibus Atticīs**  
[7] **reddās incolumem precor**  
  
[8] **et servēs animae dīmidium meae.**  
[9] **Illī rōbur et aes triplex**  
[10] **circā pectus erat, quī fragilem trucī**  
[11] **commisit pelagō ratem**  
  
[12] **prīmus, nec timuit praecipitem Āfricum**  
[13] **dēcertantem Aquilōnibus**  
[14] **nec tristis Hyadas nec rabiem Notī,**  
[15] **quō nōn arbiter Hādriae**  
[16] **major, tollere seu pōnere volt freta.**  
  
[17] **Quem mortis timuit gradum**  
[18] **quī siccīs oculīs mōnstra natantia,**  
[19] **quī vīdit mare turbidum et**  
[20] **infāmīs scopulōs Āroceraunia?**  
  
[21] **Nēquicquam deus abscidit**  
  
[22] **prūdēns Ōceanō dissociābili**  
[23] **terrās, sī tamen impiae**  
[24] **nōn tangenda ratēs trānsiliunt vada.**  
[25] **Audāx omnia perpetī**  
[26] **gēns hūmāna ruit per vetitum nefās;**  
[27] **audāx Īapetī genus**  
  
[28] **ignem fraude malā gentibus intulit;**  
[29] **post ignem aetheriā domō**  
[30] **subductum maciēs et nova fēbrium**  
[31] **terrīs incubuit cohors**  
[32] **sēmōtīque prius tarda necessitās**  
[33] **lētī corripuit gradum.**  
[34] **Expertus vacuum Daedalus āera**

[35] pennīs nōn hominī datīs;  
[36] perrūpīt Acheronta Herculeus labor.  
[37] Nīl mortālibus arduī est;

[38] caelum ipsum petimus stultitiā neque  
[39] per nostrum patimur scelus  
[40] irācunda Jovem pōnere fulmina.

## Gedicht 4

[1] Solvitur ācris hiems grātā vice vērīs et Favōnī  
[2] trahuntque siccās māchinae carīnās,  
[3] ac neque jam stabulīs gaudet pecus aut arātor ignī  
[4] nec prāta cānīs albicant pruīnīs.

[5] Jam Cytherēa chorōs dūcit Venus imminente lūnā  
[6] jūnctaeque Nymphīs Grātiaē decentēs  
[7] alternō terram quatiunt pede, dum gravīs Cyclōpum  
[8] Volcānus ārdēns vīsīt officīnās.

[9] Nunc decet aut viridī nitidum caput impedīre myrtō  
[10] aut flōre, terrae quem ferunt solūtae;  
[11] nunc et in umbrōsis Faunō decet immolāre lūcīs,  
[12] seu poscat agna sive mālīt haedō.  
[13] Pallida Mors aequō pulsāt pede pauperum tabernās  
[14] rēgumque turrīs. Ō beāte Sēstī,  
[15] vītae summa brevis spem nōs vetat inchoāre longam.  
[16] Jam tē premet nox fābulaeque Mānēs

[17] et domus exīlis Plūtōnia, quō simul meārīs,  
[18] nec rēgna vīnī sortiēre tālis  
[19] nec tenerum Lycidan mīrābere, quō calet juvenus

[20] nunc omnis et mox virginēs tepēbunt.

## Gedicht 5

[1] Quis multā gracilis tē puer in rosā

[2] perfūsus liquidīs urget odōribus  
[3] grātō, Pyrrha, sub antrō?  
[4] cui flāvam religās comam,

[5] simplex munditiīs? Heu quotiēns fidem  
[6] mūtātōsque deōs flēbit et aspera  
[7] nigrīs aequora ventīs  
[8] ēmīrābitur īsolēns,  
[9] quī nunc tē fruitur crēdulus aureā,  
[10] quī semper vacuam, semper amābilem  
[11] spērat, nēscius aurae

[12] fallācis. Miserī, quibus  
[13] intemptāta nitēs. Mē tabulā sacer

- [14] **vōtīvā pariēs indicat ūvida**  
[15] **suspendisse potenti**  
[16] **vestīmenta maris deō.**

## Gedicht 6

- [1] **Scribēris Variō fortis et hostium**
- [2] **victor, Maeoniī carminis ālite,**  
[3] **quam rem cumque ferōx nāvibus aut equīs**  
[4] **mīles tē duce gesserit.**  
[5] **Nōs, Āgrippa, neque haec dīcere nec gravem**  
[6] **Pēlīdae stomachum cēdere nēsciī,**
- [7] **nec cursūs duplicis per mare Ulixēi**  
[8] **nec saevam Pelopis domum**  
[9] **cōnāmur, tenuēs grandia, dum pudor**  
[10] **inbellisque lyrae Mūsa potēns vetat**  
[11] **laudēs ēgregiī Caesaris et tuās**  
[12] **culpā dēterere ingeni.**
- [13] **Quis Mārtem tunicā tēctum adamantinā**
- [14] **dignē scripserit aut pulvere Trōicō**  
[15] **nīgrum Mērionēn aut ope Palladis**  
[16] **Tydidēn superīs parem?**
- [17] **Nōs convīvia, nōs proelia virginum**
- [18] **sectīs in juvenēs unguibus ācrium**  
[19] **cantāmus, vacuī sive quid ūrimur**  
[20] **nōn praeter solitum levēs.**

## Gedicht 7

- [1] **Laudābunt aliī clāram Rhodon aut Mytilēnēn**
- [2] **aut Ephesum bimarisve Corinthī**  
[3] **moenia vel Bacchō Thēbās vel Apolline Delphōs**  
[4] **īsignīs aut Thessala Tempe;**
- [5] **sunt quibus ūnum opus est intāctae Palladis urbem**  
[6] **carmine perpetuō celebrāre et**  
[7] **undique dēcerptam frontī praepōnere olivam;**
- [8] **plūrimus in Jūnōnis honōrem**  
[9] **aptum dīcet equīs Argos dītēsque Mycēnās:**  
[10] **mē nec tam patiēns Lacedaemōn**  
[11] **nec tam Lārisae percussit campus opīmae**  
[12] **quam domus Albunae resonantis**

[13] **et praeceps Aniō ac Tiburnī lūcus et ūda**

[14] **mōbilibus pōmāria rīvīs.**

[15] **Albus ut obscurō dēterget nūbila caelō**

[16] **saepe Notus neque parturit imbrīs**

[17] **perpetuō, sic tū sapiēns finīre mementō**

[18] **trīstitiam vītaeque labōrēs**

[19] **mollī, Plance, merō, seu tē fulgentia signīs**

[20] **castra tenent seu dēnsa tenēbit**

[21] **Tiburis umbra tuī. Teucer Salamīna patremque**

[22] **cum fugeret, tamen ūda Lyaeō**

[23] **tempora pōpuleā fertur vīnxisse corōnā,**

[24] **sic trīstis affātus amīcōs:**

[25] **‘Quō nōs cumque feret melior fortūna parente,**

[26] **ibimus, ō sociī comitēsque.**

[27] **Nīl dēspērandum Teucrō duce et auspice Teucrō:**

[28] **certus enim prōmīsīt Apollō**

[29] **ambiguam tellūre novā Salamīna futūram.**

[30] **Ō fortēs pejōraque passī**

[31] **mēcum saepe virī, nunc vīnō pellite cūrās;**

[32] **crās ingēns iterābimus aequor.’**

## Gedicht 8

[1] **Lȳdia, dīc, per omnīs**

[2] **tē deōs ōrō, Sybarin cūr properēs amandō**

[3] **perdere, cūr aprīcum**

[4] **ōderit Campum, patiēns pulveris atque sōlis,**

[5] **cūr neque militāris**

[6] **inter aequālīs equitet, Gallica nec lupātīs**

[7] **temperet ōra frēnīs.**

[8] **Cūr timet flāvum Tiberim tangere? Cūr olīvum**

[9] **sanguīne vīperīnō**

[10] **cautius vītāt neque jam līvida gestat armīs**

[11] **bracchia, saepe discō**

[12] **saepe trāns finem jaculō nōbilis expeditō?**

[13] **quid latet, ut marīnae**

[14] **filium dīcunt Thetidis sub lacrimōsa Trōjae**

[15] **fūnera, nē virilis**

[16] **cultus in caedem et Lyciās prōriperet catervās?**

## Gedicht 9

[1] **Vidēs ut altā stet nive candidum**

[2] **Sōracte nec jam sustineant onus**

[3] **silvae labōrantēs gelūque**

[4] flūmina cōstiterint acūtō?  
[5] Dissolve frigus ligna super focō  
[6] largē repōnēns atque benignius  
[7] dēprōme quādrimum Sabinā,  
[8] ō Thaliarche, merum diōtā.  
[9] Permitte dīvis cētera, quī simul  
[10] strāvēre ventōs aequore fervidō  
[11] dēproeliantīs, nec cupressī  
[12] nec veterēs agitantur ornī.  
[13] Quid sit futūrum crās, fuge quaerere, et  
[14] quem fors diērum cumque dabit, lucrō  
[15] adpōne nec dulcīs amōrēs  
[16] sperne, puer, neque tū chorēās,

[17] dōnec virentī cānitiēs abest  
[18] mōrōsa. Nunc et Campus et āreae  
[19] lēnēsque sub noctem susurrī  
[20] compositā repetantur hōrā,

[21] nunc et latentis prōditor intumō  
[22] grātus puellae rīsus ab angulō  
[23] pignusque dēreptum lacertīs

[24] aut digitō male pertinācī.

## Gedicht 10

[1] Mercurī, fācunde nepōs Atlantis,  
[2] quī ferōs cultūs hominum recentum  
[3] vōce fōrmāstī catus et decōrae  
[4] mōre palaestrae,  
[5] tē canam, magnī Jovis et deōrum  
[6] nūntium curvaeque lyrae parentem,

[7] callidum quicquid placuit jocōsō  
[8] condere fūrtō.

[9] Tē, bovēs ōlim nisi reddidissēs  
[10] per dolum āmōtās, puerum minācī  
[11] vōce dum terret, viduus pharêtrā  
[12] rīsit Apollō.  
[13] Quīn et Ātrīdās duce tē superbōs

[14] Īliō dīvēs Priamus relictō  
[15] Thessalōsque ignīs et inīqua Trōjae  
[16] castra fefellit.

[17] Tū piās laetīs animās repōnis  
[18] sēdibus virgāque levem coercēs  
[19] aureā turbam, superīs deōrum  
[20] grātus et imīs.

# Gedicht 11

- [1] **Tū nē quaesierīs (scīre nefās) quem mihi, quem tibi**
- [2] **finem dī dederint, Leuconoē, nec Babylōniōs**
- [3] **temptārīs numerōs. Ut melius quicquid erit patī!**
- [4] **Seu plūrīs hiemēs seu tribuit Juppiter ultimam,**
- [5] **quae nunc oppositīs dēbilitat pūmicibus mare**
- [6] **Tyrrhēnum, sapiās, vīna liquēs et spatiō brevī**
- [7] **spem longam resecēs. Dum loquimur, fūgerit invida**
- [8] **aetās: carpe diem, quam minimum crēdula posterō.**

# Gedicht 12

- [1] **Quem virum aut hērōa lyrā vel ācrī**
- [2] **tībiā sūmis celebrāre, Clīō?**
- [3] **Quem deum? Cujus recinet jocōsa**
- [4] **nōmen imāgō**
- [5] **aut in umbrōsīs Helicōnis ōrīs**
- [6] **aut super Pindō gelidōve in Haemō?**
- [7] **Unde vōcālem temere īsecūtae**
- [8] **Orphea silvae**
- [9] **arte māternā rapidōs morantem**
- [10] **flūminum lāpsūs celerisque ventōs,**
- [11] **blandum et auritās fidibus canōrīs**
- [12] **dūcere quercūs.**
- [13] **Quid prius dīcam solitīs parentis**
- [14] **laudibus, quī rēs hominum ac deōrum,**
- [15] **quī mare ac terrās variisque mundum**
- [16] **temperat hōrīs?**
- [17] **Unde nīl majus generātur ipsō**
- [18] **nec viget quicquam simile aut secundum;**
- [19] **proximōs illī tamen occupābit**
- [20] **Pallas honōrēs.**
- [21] **Proeliīs audāx, neque tē silēbō,**
- [22] **Liber, et saevīs inimīca virgō**
- [23] **bēluīs, nec tē, metuende certā**
- [24] **Phoebe sagittā.**
- [25] **Dīcam et Alcīdēn puerōsque Lēdae,**



[26] **hunc equīs, illum superāre pugnīs**  
[27] **nōbilem; quōrum simul alba nautīs**  
[28] **stēlla refulsit,**  
[29] **dēfluit saxīs agitātus ūmor,**  
[30] **concidunt ventī fugiuntque nūbēs**  
[31] **et mināx, quod sīc voluēre, pontō**  
[32] **unda recumbit.**  
[33] **Rōmulum post hōs prius an quiētum**  
[34] **Pompilī rēgnum memorem, an superbōs**

[35] **Tarquinī fascēs, dubitō, an Catōnis**  
[36] **nōbile lētum.**  
[37] **Rēgulum et Scaurōs animaeque magnae**  
[38] **prōdigum Paulum superante Poenō**  
[39] **grātus insignī referam Camēnā**  
[40] **Fābriciumque.**

[41] **Hunc et incōmptīs Curium capillīs**

[42] **ūtilem bellō tulit et Camillum**  
[43] **saeva paupertās et avītus aptō**  
[44] **cum lare fundus.**  
[45] **Crēscit occultō velut arbor aevō**  
[46] **fāma Mārcellī; micat inter omnīs**

[47] **Jūlium sīdus, velut inter ignīs**  
[48] **lūna minōrēs.**  
[49] **Gentis hūmānae pater atque cūstōs,**  
[50] **orte Sāturnō, tibi cūra magnī**  
[51] **Caesaris fātīs data: tū secundō**  
[52] **Caesare rēgnēs.**

[53] **Ille seu Parthōs Latiō imminentīs**

[54] **ēgerit jūstō domitōs triumphō**  
[55] **sive subjectōs Orientis ōrae**  
[56] **Sēras et Indōs,**  
[57] **tē minor laetum reget aequus orbem:**  
[58] **tū gravī currū quatiēs Olympum,**

[59] **tū parum castīs inimīca mittēs**  
[60] **fulmina lūcīs.**

## Gedicht 13

[1] **Cum tū, Lȳdia, Tēlephī**  
[2] **cervicem roseam, cērea Tēlephī**  
[3] **laudās bracchia, vae, meum**

[4] **fervēns difficilī bile tumet jecur.**  
[5] **Tunc nec mēns mihi nec color**  
[6] **certā sēde manet, ūmor et in genās**  
[7] **fūrtim lābitur, arguēns**

[8] **quam lentīs penitus mācerer ignibus.**

[9] Ūror, seu tibi candidōs  
[10] turpārunt umerōs inmodicae merō  
[11] rixae, sive puer furēns  
[12] inpressit memorem dente labrīs notam.  
[13] Nōn, sī mē satis audiās,  
[14] spērēs perpetuum dulcia barbarē  
[15] laedentem ōscula, quae Venus

[16] quīntā parte suī nectaris imbuit.  
[17] Fēlicēs ter et amplius  
[18] quōs inrupta tenet cōpula nec malīs  
[19] divolsus querimōniīs

[20] sūprēmā citius solvet amor diē.

## Gedicht 14

[1] Ō nāvis, referent in mare tē novī

[2] flūctūs. Ō quid agis? Fortiter occupā  
[3] portum. Nōne vidēs ut  
[4] nūdum rēmigiō latus,  
[5] et mālus celerī saucius Āfricō  
[6] antemnāque gemant ac sine fūnibus  
[7] vix dūrāre carīnae

[8] possint imperiōsius

[9] aequor? Nōn tibi sunt integra lintea,  
[10] nōn dī, quōs iterum pressa vocēs malō.  
[11] Quamvis Pontica pīnus,

[12] silvae filia nōbillis,  
[13] jactēs et genus et nōmen inūtile:

[14] nīl pictīs timidus nāvita puppibus

[15] fidit. Tū, nisi ventīs  
[16] dēbēs lūdibrium, cave.

[17] Nūper sollicitum quae mihi taedium,  
[18] nunc dēsiderium cūraque nōn levis,  
[19] interfūsa nitentīs  
[20] vitēs aequora Cŷcladās.

## Gedicht 15

[1] Pāstor cum traheret per freta nāvibus  
[2] Īdaeīs Helenēn perfidus hospitam,

[3] ingrātō celerīs obruit ōtiō  
[4] ventōs ut caneret fera  
[5] Nēreus fāta: ‘Malā dūcis avī domum

[6] **quam multō repetet Graecia milite,**  
[7] **conjūrāta tuās rumpere nūptiās**  
[8] **et rēgnum Priamī vetus.**  
[9] **Heu, heu, quantus equīs, quantus adest virīs**  
[10] **sūdor! Quanta movēs fūnera Dardanae**  
[11] **gentī! Jam galeam Pallas et aegida**  
[12] **currūsque et rabiem parat.**

[13] **Nēquicquam Veneris praesidiō ferōx**  
[14] **pectēs caesariem grātaque fēminīs**

[15] **inbellī citharā carmina dīvidēs;**  
[16] **nēquicquam thalamō gravīs**  
[17] **hastās et calamī spīcula Cnōsī**  
[18] **vītābis strepitumque et celerem sequī**  
[19] **Ājācem: tamen, heu sērus, adulterōs**  
[20] **crīnēs pulvere collinēs.**

[21] **Nōn Lāertiadēn, exitium tuae**

[22] **gentis, nōn Pylīum Nestora rēspicis?**

[23] **Urgent inpavidī tē Salamīnius**  
[24] **Teucer, tē Sthenelus sciēs**  
[25] **pugnae, sive opus est imperitāre equīs,**  
[26] **nōn aurīga piger; Mērionēn quoque**  
[27] **nōscēs. Ecce furit tē reperīre atrōx**  
[28] **Tȳdīdēs melior patre,**  
[29] **quem tū, cervus utī vallis in alterā**

[30] **vīsum parte lupum grāminis inmemor,**

[31] **sublīmī fugiēs mollis anhelitū,**  
[32] **nōn hoc pollicitus tuae.**  
[33] **Īrācunda diem prōferet Īliō**  
[34] **mātrōnisque Phrygum classis Achilleī;**  
[35] **post certās hiemēs ūret Achāicus**

[36] **ignis Īliacās domōs.'**

## Gedicht 16

[1] **Ō mātē pulchrā filia pulchrior,**  
[2] **quem crīminōsīs cumque volēs modum**  
[3] **pōnēs iambīs, sive flammā**  
[4] **sive marī libet Hādriānō.**  
[5] **Nōn Dindymēnē, nōn adytīs quatit**  
[6] **mentem sacerdotum incola Pȳthius,**  
[7] **nōn Liber aequē, nōn acūta**  
[8] **sīc geminant Corybantes aera,**  
[9] **trīstēs ut īrae, quās neque Nōricus**  
[10] **dēterret ēnsīs nec mare naufragum**  
[11] **nec saevus ignis nec tremendō**  
[12] **Juppiter ipse ruēns tumultū.**  
[13] **Fertur Promētheus addere principī**  
[14] **līmō coāctus particulam undique**  
[15] **dēsēctam et insānī leōnis**

- [16] **vim stomachō apposuisse nostrō.**  
[17] **Īrae Thyestēn exitiō gravi**  
[18] **strāvēre et altīs urbibus ultimae**  
[19] **stetēre causae, cūr perīrent**
- [20] **funditus inprimeretque mūrīs**  
[21] **hostile arātrum exercitus insolēns.**  
[22] **Conpēsce mentem: mē quoque pectoris**  
[23] **temptāvit in dulcī juventā**  
[24] **fervor et in celerēs iambōs**  
[25] **mīsīt furentem. Nunc ego mītibus**  
[26] **mūtāre quaerō trīstia, dum mihi**  
[27] **fiās recantātis amīca**  
[28] **opprobriīs animumque reddās.**

## Gedicht 17

- [1] **Vēlōx amoenum saepe Lucrētilem**  
[2] **mūtat Lycaeō Faunus et igneam**  
[3] **dēfendit aestātem capellīs**  
[4] **usque meīs pluviōsque ventōs.**  
[5] **Inpūne tūtum per nemus arbutōs**  
[6] **quaerunt latentis et thyma dēviae**  
[7] **ōlentis uxōrēs marītī**  
[8] **nec viridīs metuunt colūbrās**
- [9] **nec Mārtiālīs haediliae lupōs,**  
[10] **utcumque dulcī, Tyndari, fistulā**  
[11] **vallēs et Ustīcae cubantis**  
[12] **lēvia personuēre saxa.**  
[13] **Dī mē tuentur, dīs pietās mea**
- [14] **et Mūsa cordī est. Hīc tibi cōpia**  
[15] **mānābit ad plēnum benignō**  
[16] **rūris honōrum opulenta cornū;**  
[17] **hīc in reductā valle Canīculae**
- [18] **vītābis aestūs et fide Tēiā**  
[19] **dīcēs labōrantīs in ūnō**  
[20] **Pēnelopēn vitreamque Circēn;**
- [21] **hīc innocentis pōcula Lesbī**  
[22] **ducēs sub umbrā nec Semelēius**  
[23] **cum Mārte cōfundet Thyōneus**  
[24] **proelia nec metuēs protervum**  
[25] **suspecta Cŷrum, nē male disparī**
- [26] **incontinentīs iniciat manūs**  
[27] **et scindat haerentem corōnam**
- [28] **crīnibus inmeritamque vestem.**

# Gedicht 18

- [1] **Nūllam, Vāre, sacrā vīte prius sēveris arborem**
- [2] **circā mīte solum Tīburis et moenia Cātīlī;**
- [3] **siccīs omnia nam dūra deus prōposuit neque**
- [4] **mordācēs aliter diffugiunt sollicitūdinēs.**
- [5] **Quis post vīna gravem militiam aut pauperiem crepat?**  
[6] **Quis nōn tē potius, Bacche pater, tēque decēns Venus?**
- [7] **Ac nē quis modicī trānsiliat mūnera Līberī,**
- [8] **Centaurēa monet cum Lapithīs rixa super merō**
- [9] **dēbellāta, monet Sīthoniīs nōn levis Euhius,**
- [10] **cum fās atque nefās exiguō fine libīdinum**
- [11] **discernunt avidī. Nōn ego tē, candide Bassareu,**
- [12] **invītum quatiā nec variīs obsīta frondibus**  
[13] **sub dīvum rāpiam. Saeva tenē cum Berecynthiō**  
[14] **cornū tympana, quae subsequitur caecus amor suī**
- [15] **et tollēns vacuum plūs nīmīō glōria verticem**
- [16] **arcānīque fidēs prōdīga, perlūcidior vitrō.**

# Gedicht 19

- [1] **Māter saeva Cupīdinum**  
[2] **Thēbānaeque jubet mē Semelae puer**
- [3] **et lascīva Licentia**  
[4] **fīnītis animum reddere amōribus.**  
[5] **Ūrit mē Glycerae nitor**
- [6] **splendentis Pariō marmore pūrius;**  
[7] **ūrit grāta protervitās**
- [8] **et voltus nimium lūbricus aspici.**  
[9] **In mē tōta ruēns Venus**  
[10] **Cyprum dēseruit, nec patitur Scythās**  
[11] **aut versīs animōsum equīs**
- [12] **Parthum dīcere nec quae nihil attinent.**

[13] **Hīc vīvum mihi caespitem, hīc**  
[14] **verbēnās, puerī, pōnite tūraque**  
[15] **bīmī cum paterā merī:**

[16] **mactātā veniet lēnior hostiā.**

## Gedicht 20

[1] **Vīle pōtābis modicīs Sabīnum**  
[2] **cantharīs, Graecā quod ego ipse testā**  
[3] **conditum lēvī, datus in theātrō**  
[4] **cum tibi plausus,**  
[5] **cāre Maecēnās eques, ut paternī**

[6] **flūminis rīpae simul et jocōsa**

[7] **redderet laudēs tibi Vāticānī**  
[8] **montis imāgō.**  
[9] **Caecubum et prēlō domitam Calēnō**  
[10] **tū bibēs ūvam; mea nec Falernae**  
[11] **temperant vītēs neque Formiānī**  
[12] **pōcula collēs.**

## Gedicht 21

[1] **Dīānam tenerae dīcite virginēs,**

[2] **intōnsum, puerī, dīcite Cynthium**  
[3] **Lātōnamque suprēmō**  
[4] **dilēctam penitus Jovī;**  
[5] **vōs laetam fluvīis et nemorum comā,**

[6] **quaecumque aut gelidō prōminet Algidō,**  
[7] **nigrīs aut Erymanthī**

[8] **silvīs aut viridis Gragī;**

[9] **vōs Tempē totidem tollite laudibus**  
[10] **nātālemque, marēs, Dēlon Apollinis**  
[11] **īsignemque pharētrā**  
[12] **frāternāque umerum lyrā.**

[13] **Hic bellum lacrimōsum, hic miseram famem**  
[14] **pestemque ā populō et prīncipe Caesare in**  
[15] **Persās atque Britannōs**  
[16] **vestrā mōtus aget prece.**

## Gedicht 22

[1] Integer vitæ scelerisque purus  
[2] nōn eget Mauris jaculis neque arcū  
[3] nec venenātis gravidā sagittis,  
[4] Fusce, pharētrā,  
[5] sive per Syrtis iter aestuōsās  
[6] sive factūrus per inhospitālem  
[7] Caucasum vel quae loca fābulōsus  
[8] lambit Hydasēs.  
[9] Namque mē silvā lupus in Sabīnā,  
[10] dum meam cantō Lalagēn et ultrā  
[11] terminum cūrīs vagor expeditis,  
[12] fūgit inermem,  
[13] quāle portentum neque militāris  
[14] Daunias lātis alit aesculētis  
[15] nec Jubae tellūs generat, leōnum  
[16] ārida nūtrix.  
[17] Pōne mē pīgrīs ubi nūlla campīs  
[18] arbor aestivā recreātur aurā,  
[19] quod latus mundi nebulae malusque  
[20] Juppiter urget;

[21] pōne sub currū nimium propinquī

[22] sōlis in terrā domibus negātā:  
[23] dulce ridentem Lalagēn amābō,  
[24] dulce loquentem.

## Gedicht 23

[1] Vitās hinnuleō mē similis, Chloē,

[2] quaerentī pavidam montibus āviīs  
[3] mātrem nōn sine vānō  
[4] aurārum et silvae metū.

[5] Nam seu mōbilibus vēris inhorruit

[6] adventus foliīs, seu viridēs rubum  
[7] dīmōvēre lacertae,  
[8] et corde et genibus tremit.  
[9] Atquī nōn ego tē, tigris ut aspera  
[10] Gaetūlusve leō, frangere persequor:  
[11] tandem dēsine mātrem  
[12] tempestiva sequī virō.

## Gedicht 24

[1] Quis dēsideriō sit pudor aut modus

[2] tam cārī capitis? Praecipe lūgubrīs

[3] **cantūs, Melpomenē, cui liquidam pater**  
[4] **vōcem cum citharā dedit.**  
[5] **Ergō Quīntilium perpetuus sopor**

[6] **urget? cui Pudor et Jūstitiae soror,**

[7] **incorrupta Fidēs, nūdaque Vēritās**  
[8] **quandō ūllum inveniet parem?**

[9] **Multīs ille bonīs flēbilis occidit,**

[10] **nūllī flēbilior quam tibi, Vergili.**

[11] **Tū frūstrā pius, heu, nōn ita crēditum**

[12] **poscis Quīntilium deōs.**

[13] **Quid sī Thrēiciō blandius Orpheō**  
[14] **audītam moderēre arboribus fidem?**

[15] **Num vānae redeat sanguis imāginī,**  
[16] **quam virgā semel horridā,**  
[17] **nōn lēnis precibus fāta reclūdere,**  
[18] **nigrō compulerit Mercurius gregī?**

[19] **dūrum: sed levius fit patientiā**

[20] **quicquid corrigere est nefās.**

## Gedicht 25

[1] **Parcius jūctās quatiunt fenestrās**  
[2] **jactibus crēbrīs juvenēs protervī**  
[3] **nec tibi somnōs adimunt amatque**  
[4] **jānua līmen,**

[5] **quae prius multum facilis movēbat**

[6] **cardinēs. Audīs minus et minus jam:**  
[7] **‘Mē tuō longās pereunte noctēs,**  
[8] **Lȳdia, dormīs? ’**  
[9] **Invicem moechōs anus arrogantis**

[10] **flēbis in sōlō levis angiportū**

[11] **Thrāciō bacchante magis sub inter**  
[12] **lūnia ventō,**  
[13] **cum tibi flāgrāns amor et libīdō,**  
[14] **quae solet mātērēs furiāre equōrum,**  
[15] **saeviet circā jecur ulcerōsum**  
[16] **nōn sine questū,**



[17] **laeta quod pūbēs hederā virentī**  
[18] **gaudeat pullā magis atque myrtō,**

[19] **āridās frondēs hiemis sodālī**  
[20] **dēdicet Eurō.**

## Gedicht 26

[1] **Mūsīs amicus trīstitiam et metūs**  
[2] **trādam protervīs in mare Crēticum**  
[3] **portāre ventīs, quis sub Arctō**  
[4] **rēx gelidae metuātur ōrae,**

[5] **quid Tīridātēn terreat, ūnicē**  
[6] **sēcūrus. Ō quae fontibus integrīs**  
[7] **gaudēs, apricōs necte flōrēs,**  
[8] **necte meō Lamiae corōnam,**

[9] **Pimplēa dulcis. Nīl sine tē meī**  
[10] **prōsunt honōrēs; hunc fidibus novīs,**  
[11] **hunc Lesbiō sacrāre plēctrō**  
[12] **tēque tuāsque decet sorōrēs.**

## Gedicht 27

[1] **Nātīs in ūsum laetitiae scyphīs**  
[2] **pugnāre Thrācum est; tollite barbarum**  
[3] **mōrem verēcundumque Bacchum**

[4] **sanguineīs prohibēte rixīs.**  
[5] **Vinō et lucernīs Mēdus acīnacēs**

[6] **immāne quantum discrepat; impium**  
[7] **lēnīte clāmōrem, sodālēs,**  
[8] **et cubitō remanēte pressō.**  
[9] **Voltis sevērī mē quoque sūmere**  
[10] **partem Falernī? Dīcat Opūntiae**  
[11] **frāter Megyllae quō beātus**  
[12] **volnere, quā pereat sagittā.**  
[13] **Cessat voluntās? Nōn aliā bibam**  
[14] **mercēde. Quae tē cumque domat Venus**  
[15] **nōn ērubescendīs adūrit**

[16] **ignibus ingenuōque semper**  
[17] **amōre peccās. Quicquid habēs, age,**  
[18] **dēpōne tūtis auribus. Ā! miser,**  
[19] **quantā labōrābās Charybdī,**  
[20] **digne puer meliōre flammā.**  
[21] **Quae sāga, quis tē solvere Thessalīs**  
[22] **māgus venēnīs, quis poterit deus?**

[23] **vix inligātum tē trifōrmī**  
[24] **Pēgusus expedit Chimaerā.**

# Gedicht 28

[1] Tē maris et terrae numerōque carentis harēnae  
[2] mēnsōrem cohibent, Archȳta,  
[3] pulveris exigui prope lātum parva Matīnum

[4] mūnera nec quicquam tibi prōdest  
[5] āeriās temptāsse domōs animōque rotundum  
[6] percurrisse polum moritūrō.

[7] Occidit et Pelopis genitor, convīva deōrum,  
[8] Tithōnusque remōtus in aurās  
[9] et Jovis arcānīs Mīnōs admissūs habentque  
[10] Tartara Panthoidēn iterum Orcō  
[11] dēmissum, quamvis clipeō Trōjāna refixō  
[12] tempora testātus nihil ultrā  
[13] nervōs atque cutem mortī concesserat ātrae,  
[14] jūdice tē nōn sordidus auctor  
[15] nātūrae vērique. Sed omnis ūna manet nox  
[16] et calcanda semel via lētī.  
[17] Dant aliōs Furiae torvō spectācula Mārtī,

[18] exitiō est avidum mare nautīs;  
[19] mixta senum ac juvenum dēsentur fūnera, nūllum  
[20] saeva caput Prōserpina fugit.  
[21] Mē quoque dēvēxī rapidus comes Ōrīōnis  
[22] Illyricīs Notus obruit undīs.  
[23] At tū, nauta, vagae nē parce malignus harēnae  
[24] ossibus et capitī nec humātō

[25] particulam dare: sīc, quodcumque minābitur Eurūs  
[26] flūctibus Hesperīis, Venusīnae  
[27] plectantur silvae tē sospite multaque mercēs,  
[28] unde potest, tibi dēfluat aequō  
[29] ab Jove Neptūnōque sacrī cūstōde Tarentī.

[30] Nēglegis inmeritis nocitūram  
[31] postmodo tē natis fraudem committere? Fors et  
[32] dēbita jūra vicēsque superbae

[33] tē maneant ipsum: precibus nōn linquar inultis  
[34] tēque piācula nūlla resolvent.  
[35] Quamquam festinās, nōn est mora longa; licēbit  
[36] injectō ter pulvere currās.

# Gedicht 29

[1] Iccī, beātis nunc Arabum invidēs  
[2] gāzīs et ācrem militiam parās  
[3] nōn ante dēvictīs Sabaeae

[4] rēgibus horribilique Mēdō

[5] nectis catēnās? Quae tibi virginum  
[6] spōnsō necātō barbara serviet?  
[7] puer quis ex aulā capillīs  
[8] ad cyathum statuētur ūnctīs,

[9] **doctus sagittās tendere Sēricās**  
[10] **arcū paternō? Quis neget arduīs**  
[11] **prōnōs relābī posse rīvōs**

[12] **montibus et Tiberim revertī,**  
[13] **cum tū coēptōs undique nōbilīs**  
[14] **librōs Panaetī Sōcraticam et domum**  
[15] **mūtāre lōricīs Hibēris,**

[16] **pollicitus meliōra, tendis?**

## Gedicht 30

[1] **Ō Venus rēgīna Cnidī Paphīque,**  
[2] **sperne dīlēctam Cypron et vocantis**  
[3] **tūre tē multō Glycerae decōram**  
[4] **trānsfer in aedem.**  
[5] **Fervidus tēcum puer et solūtis**  
[6] **Grātiaē zōnis properentque Nymphae**  
[7] **et parum cōmis sine tē Juventās**  
[8] **Mercuriusque.**

## Gedicht 31

[1] **Quid dēdicātum poscit Apollinem**  
[2] **vātēs? Quid ōrat, dē paterā novum**  
[3] **fundēns liquōrem? Nōn opīmae**  
[4] **Sardiniae segetēs ferācēs,**  
[5] **nōn aestuōsae grāta Calābriae**  
[6] **armenta, nōn aurum aut ebur Indicum,**

[7] **nōn rūra, quae Liris quiētā**  
[8] **mordet aquā taciturnus amnis.**  
[9] **Premant Calēnā falce quibus dedit**  
[10] **Fortūna vitem, dives et aureīs**  
[11] **mercātor exsiccet culillīs**  
[12] **vīna Syrā reparāta merce,**  
[13] **dīs cārus ipsīs, quippe ter et quater**  
[14] **annō revīsēns aequor Atlanticum**  
[15] **inpūne: mē pascust olivae,**  
[16] **mē cichorēa levēsque malvae.**  
[17] **Fruī parātīs et validō mihī,**  
[18] **Lātōe, dōnēs, at, precor, integrā**  
[19] **cum mente, nec turpem senectam**  
[20] **dēgere nec citharā carentem.**

## Gedicht 32

[1] **Poscimus. Sī quid vacuī sub umbrā**  
[2] **lūsimus tēcum, quod et hunc in annum**  
[3] **vīvat et plūris, age, dīc Latīnum,**  
[4] **barbite, carmen,**  
[5] **Lesbiō primum modulāte civī,**  
[6] **quī, ferōx bellō, tamen inter arma,**  
[7] **sive jactātam religārat ūdō**  
[8] **lītore nāvem,**  
[9] **Liberum et Mūsās Veneremque et illī**  
[10] **semper haerentem puerum canēbat**

[11] **et Lycum nīgrīs oculīs nigrōque**  
[12] **crīne decōrum.**  
[13] **Ō decus Phoebī et dapibus suprēmī**  
[14] **grāta testūdō Jovis, ō labōrum**  
[15] **dulce lēnīmen, mihi cumque salvē**  
[16] **rīte vocantī.**

## Gedicht 33

[1] **Albī, nē doleās plūs nimiō memor**

[2] **inmītis Glycerae neu miserābilis**

[3] **dēscantēs elegōs, cūr tibi jūnior**  
[4] **laesā praeniteat fide.**

[5] **Īnsignem tenuī fronte Lycōrida**  
[6] **Cȳrī torret amor, Cȳrus in asperam**  
[7] **dēclīnat Pholoēn: sed prius Āpulīs**  
[8] **jungentur capreae lupīs**  
[9] **quam turpī Pholoē peccet adulterō.**  
[10] **Sīc vīsum Venerī, cui placet imparīs**  
[11] **fōrmās atque animōs sub juga aēnea**  
[12] **saevō mittere cum jocō.**  
[13] **Ipsū mē melior cum peteret Venus,**  
[14] **grātā dētīnuit compede Myrtalē**  
[15] **lībertyna, fretīs ācrior Hādriae**  
[16] **curvantīs Calabrōs sinūs.**

## Gedicht 34

[1] **Parcus deōrum cultor et īnfrequēns,**

[2] **īnsānientis dum sapientiae**  
[3] **cōsultus errō, nunc retrōrsum**  
[4] **vēla dare atque iterāre cursūs**

[5] **cōgor relictōs: namque Diespiter**

[6] **ignī coruscō nūbila dīvidēns**  
[7] **plērumque, per pūrum tonantis**  
[8] **ēgit equōs volucremque currum,**  
[9] **quō brūta tellūs et vaga flūmina,**  
[10] **quō Styx et invīsī horrida Taenarī**  
[11] **sēdēs Atlantēusque finis**  
[12] **concutitur. Valet īma summīs**  
[13] **mūtāre et īnsignem attenuat deus,**  
[14] **obscura prēmēs; hinc apicem rapāx**  
[15] **Fortūna cum strīdōre acūtō**  
[16] **sustulit, hīc posuisse gaudet.**

## Gedicht 35

[1] **Ō dīva, grātum quae regis Antium,**  
[2] **praesēns vel īmō tollere dē gradū**  
[3] **mortāle corpus vel superbōs**  
[4] **vertere fūneribus triumphōs,**

[5] **tē pauper ambit sollicitā prece**

[6] **rūris colōnus, tē dominam aequoris**

[7] **quicumque Bithynā laccessit**

[8] **Carpathium pelagus carinā.**

[9] **Tē Dācus asper, tē profugī Scythae,**

[10] **urbēsque gentēsque et Latium ferōx**

[11] **rēgumque matrēs barbarōrum et**

[12] **purpureī metuunt tyrannī,**

[13] **injuriōsō nē pede prōruās**

[14] **stantem columnam, neu populus frequēns**

[15] **ad arma cessantis, ad arma**

[16] **concitet imperiumque frangat.**

[17] **Tē semper anteit serva Necessitās,**

[18] **clāvōs trabālīs et cuneōs manū**

[19] **gestāns aenā nec sevērus**

[20] **uncus abest liquidumque plumbum;**

[21] **tē Spēs et albō rāra Fidēs colit**

[22] **vēlāta pannō nec comitem abnegat,**

[23] **utcumque mūtātā potentis**

[24] **veste domōs inimica linquis;**

[25] **at volgus infidum et meretrīx retrō**

[26] **perjūra cēdit, diffugiunt cadīs**

[27] **cum faece siccātis amīcī,**

[28] **ferre jugum pariter dolōsī.**

[29] **Servēs itūrum Caesarem in ultimōs**

[30] **orbis Britannōs et juvenum recēns**

[31] **exāmen Eōis timendum**

[32] **partibus Oceanōque rūbrō.**

[33] **Heu heu, cicātricum et sceleris pudet**

[34] **frātrumque. Quid nōs dūra refūgimus**

[35] **aetās, quid intāctum nefāstī**

[36] **līquimus? Unde manum juventūs**

[37] **metū deōrum continuit? Quibus**

[38] **pepercit ārīs? Ō utinam novā**

[39] **incūde diffingās retūsum in**

[40] **Massagetās Arabāsque ferrum!**

## Gedicht 36

[1] **Et tūre et fidibus juvat**

[2] **plācāre et vitulī sanguine dēbitō**

[3] **cūstōdēs Numidae deōs,**

[4] **quī nunc Hesperīā sospes ab ultimā**

[5] **cārīs multa sodālībūs,**

[6] **nūllī plūra tamen dīvidit ōscula**

[7] **quam dulcī Lamiae, memor**

[8] **actae nōn aliō rēge puertiae**

[9] **mūtataeque simul togae.**

[10] **Cressā nē careat pulchra diēs notā**  
[11] **neu prōmptae modus amphorae**

[12] **neu mōrem in Salium sit requiēs pedum**  
[13] **neu multī Damalis merī**

[14] **Bassum Thrēiciā vincat amystide**  
[15] **neu dēsint epulīs rosae**  
[16] **neu vīvāx apium neu breve līlium.**  
[17] **Omnēs in Damalīn putrēs**  
[18] **dēpōnent oculōs nec Damalis novō**  
[19] **divellētur adulterō**

[20] **lascīvīs hederīs ambitiōsior.**

## Gedicht 37

[1] **Nunc est bibendum, nunc pede liberō**  
[2] **pulsanda tellus, nunc Saliāribus**  
[3] **ōrnāre pulvīnar deōrum**  
[4] **tempus erat dapibus, sodālēs.**  
[5] **Antehāc nefās dēprōmere Caecubum**  
[6] **cellīs avītis, dum Capitōliō**  
[7] **rēgīna dēmentis ruīnās**  
[8] **fūnus et imperiō parābat**  
[9] **contāminātō cum grege turpium**

[10] **morbō virōrum, quidlibet impotēns**  
[11] **spērāre fortūnāque dulcī**

[12] **ēbria. Sed minuit furōrem**

[13] **vix ūna sospes nāvis ab ignibus,**  
[14] **mentemque lymphātam Mareōticō**

[15] **redēgit in vērōs timōrēs**  
[16] **Caesar, ab Italiā volantem**  
[17] **rēmīs adurgēns, accipiter velut**  
[18] **mollīs columbās aut leporem citus**

[19] **vēnātor in campīs nivālis**  
[20] **Haemoniae, daret ut catēnīs**  
[21] **fātāle mōnstrum. Quae generōsius**  
[22] **perīre quaerēns nec muliēbriter**  
[23] **expāvit ēnsem nec latentīs**  
[24] **classe citā reparāvit ōrās,**  
[25] **ausa et jacentem vīsere rēgiam**  
[26] **voltū serēnō, fortis et asperās**  
[27] **tractāre serpentēs, ut ātrum**  
[28] **corpore conbiberet venēnum,**  
[29] **dēliberātā morte ferōcior:**

[30] **saevīs Liburnīs scīlicet invidēns**  
[31] **privāta dēdūcī superbō,**

[32] **nōn humilis mulier, triumphō.**

# Gedicht 38

[1] **Persicōs ōdī, puer, apparātūs,**

[2] **displicent nexae philyrā corōnae,**

[3] **mitte sectārī, rosa quō locōrum**

[4] **sēra morētur.**

[5] **Simplici myrtō nihil adlabōrēs**

[6] **sēdulus, cūrō: neque tē ministrum**

[7] **dēdecet myrtus neque mē sub artā**

[8] **vīte bibentem.**